

# Pisortanit ikorsiissutit pillugit Inatsisartut Inatsisaat pillugu Namminersorlutik Oqartussat inatsimmik nalunaarutaat

Matumuuna Pisortanit ikorsiissutit pillugit Inatsisartut Inatsisaat nr. 6, 20. juuni 2022-meersoq, Inatsisartut inatsisaat nr. 25, 25. november 2022-meersumi aamma Inatsisartut inatsisaat nr. 32, 13. juni 2023-meersumi allannguutit ilanngullugit, nalunaarutigineqarpoq.

## Kapitali 1

*Siunertaq inuttullu ataasiakkaatut akisussaaffik*

### § 1. Inatsisartut inatsisaanni matumani siunertarineqarpoq

- 1) inuit suliffeqaannarnissamik ajornartorsiortut ajornartorsiulersinnaasulluunniit pilersornissaminut ikiorneqarnissamik pisariaqartitsisut pitsaliornissaat, aamma
- 2) inunnut imminnut ilaqtuttaminnullu pisariaqartitanik arlaatigut pissarsisinnaanngitsunut aningaasaqarnikkut ajutuunnginnissaannik pilersitsinissaq.

*Imm. 2. Inatsisartut Inatsisaat manna malillugu aningaasaqarnikkut ikuusoqarnissaani ikorsiissutinik tigusisartup imminut pilersorsinnaalernissaa siunertaavoq. Taamaattumik tigusisussaq pisinnaasani malillugu sulisinnaassutsiminiq atuissaq ineriertortitsillunilu.*

*Imm. 3. Tigusisussap nammineerluni pisariaqartitani naatsorsuutigisanilu aallaavigalugit ikorsiissutit piareersarnissaanni sunniuteqarsinnaanerminut akisussaaqataanissaminullu periarfissaqassaaq.*

### § 2. Pisortanut tunngatillugu kinaluunniit imminut, aapparisaminut meeqqaminullu 18-t inorlugit ukiulinnut pilersuinissamik pisussaaffeqarpoq.

*Imm. 2. Aapparisamut pilersuinissamut pisussaatitaaffik averusernermi avinnermiluunniit unissaaq.*

*Imm. 3. Meeqqamut pilersuisussaatitaaneq meeraq aapparisamut meeqqamulluunniit pilersuisussaatitaasunngorpat unissaaq.*

*Imm. 4. Panimmut 18-t inorlugit ukiulimmut naartusumut naartunerup kingunerisaanik pisariaqartinneqartut akilernissaannut angajoqqaat pilersuisussaanermut akisussaaffiat apeqqutaatinnagu pisortat ikorsiissapput.*

## Kapitali 2

*Nassuaatit*

### § 3. Pisortanit ikorsiissutit Inatsisartut Inatsisaanni matumani imatut nassuarneqarput:

- 1) kapitali 6 naapertorlugu aalajangersimasumik akigititaqarnikkut pilersuinissamut annertussusileriikkaniq ikorsiisarneq, imaluunniit
- 2) kapitali 7 naapertorlugu tassanngaannaq pisunut pisariaqartitsineq malillugu ikorsiineq aammalu tigussaasumik nalileereernikkut ataasiaannarluni aningaasartuutit.

**§ 4.** Pisortanit ikorsiissutinik tigusisartup inooqatigisaa inuttut isigineqartussaq taassaassaaq

- 1) inuk katissimasaq,
- 2) nalunaarsukkamik inooqatigilersimasaq, imaluunniit
- 3) katissimasutut assingusumik inooqatigisaa.

### Kapitali 3

*Piumasaqaatit nalinginnaasut*

*Sumi najugaqarnermut piumasaqaat*

**§ 5.** Pisortanit ikorsiissutinik tigusinissamut pisinnaatitaaffeqarnermi pineqartup Kalaallit Nunaanni aalajangersimasumik najugaqartuunissaq inuillu allattorsimaffiannut ilaanissaq piumasarineqarpoq, aamma:

- 1) danskit naalagaaffianni innuttaassuseqarnissaq,
- 2) danskit naalagaaffianni innuttaasumut katissimanissaq imaluunniit kingullermik katikkami danskit naalagaaffianni innuttaasumut katissimanissaq, imaluunniit
- 3) nunanut allanut imaluunniit nunat tamalaat akornanni kattuffinnut isumaqatigiissutini, danskit naalagaaffianni innuttaanngitsut Kalaallit Nunaanniinnerminni ataavartumik pilersuinermut akiligassanullu aalajangersimasunut ikorsiissutisisinnaatitaanerannik imalinni, ilaanissaq.

*Imm. 2.* Inuit aalajangersimasumik najugaqarnatik Kalaallit Nunaanniittut, najugaqarnatillu Kalaallit Nunaanni inuit allattorsimaffiannut nalunaarsimasut kalaallinut inuiaqatigiinnut aalajangersimasumik attaveqarunik pisortanit ikorsiissutinik pisinnaatitaapput. *Imm. 1, nr. 1-3, assinganik atorneqarsinnaapput.*

*Naalagaaffimmi innuttaassuseqartut nunanit allaneersut*

**§ 6.** Kommunalbestyrelse inummut § 31-imik piumasarineqartunik naammassinnngitsumut § 30 malillugu tassanngaannartumik ikorsiissutinik tunniussisinnaavoq, matumanit qinnuteqartoq taassumaluunniit inooqataa namminneerlutik aningaasartuutit akilernissaannut aningaasaqarnikkut periarfissaqarsimanngippata. Tassanngaannartumik ikorsiissutit taamaallaat qaammammut ataasiarluni tunniunneqarsinnaapput, taamaattoq imm. 2 takuu.

*Imm. 2.* Inuk Kalaallit Nunaanni nunaniluunniit allani angalanissanut killilersuinerit inatsisitigut pisussaaffiusut kingunerisaannik angalaqqusaassanngippat angalanissanut killilersuinerit atorunnaarnissaat tikillugu tassanngaannartumik ikorsiissutit tunniunneqarsinnaapput.

**§ 7.** Kommunalbestyrelse qinnuteqartumut Kalaallit Nunaanni kommunimi najugaqarfingisaaniittumut § 5-imik piumasarineqartunik naammassinnngitsumut § 36 malillugu angalanermut aningaasartuutit akilernissaannut ikorsiissutinik tunniussisinnaavoq.

*Imm. 2. Kommunalbestyrelse inunnut Isumaginninnikkut Isumannaarinerit pillugit Nunat Avannarliit Isumaqtigisiuttaannut aammalu nunat avannarliit isumaginninnikkut ikorsiisarneq sullissiarnerlu pillugit isumaqtigisiuttaannut ilaasunut Kalaallit Nunaata avataani najukkamut aalajangersimasumut angerlartussat akiliunnissaannut ikorsiissutinik tunniussisinnaavoq, matumani qinnuteqartoq imaluunniit taassuma inooqataa aningaasartuutit akilernissaannut aningaasaqarnikkut periarfissaqanngippata.*

#### *Ikorsiissutit annertussusileriikkat*

**§ 8.** Inatsisartut inatsisaat manna malillugu qinnuteqartup suliffeqartuunnginnissaa, pisarnerlu malillugu sapaatip akunneranut ikinnerpaamik 20 tiimini sulisinnaannginnissaa ikorsiissutinik annertussusileriikkkanik aalajangersarneqareersunik tigusinissamut piumasaqataavoq, taamaattoq takuu imm. 2 aamma § 39, imm. 2.

*Imm. 2. Qinnuteqartoq 18-it inorlugit ukiulik pilersuisussaatitaasoq suliffissaqarsimanngippat Inatsisartut inatsisaat manna malillugu ikorsiissutinik annertussusileriikkkanik tigusisinnavaoq.*

**§ 9.** Qinnuteqartoq allatut pilersuinissamut tunngavissaqareersimappat ikorsiissutit annertussusileriikkat tunniunneqarsinnaanngillat, taamaattoq imm. 2 takuu.

*Imm. 2. Ikorsiissutit annertussusileriikkat qinnuteqartunut nammineq angerlarsimaffigisap avataani paaqqinnittarfimmi, ulloq unnuarlu neqeroorummi assigisaanniluunniit sivisunerusumik najugaqartunut, tassanilu pisortat aningaasartuutinik akiliisartillugit, tunniunneqarsinnaapput, taamaattoq imm. 3 takuu.*

*Imm. 3. Ikorsiissutit annertussusileriikkat pinerluttulerinermik inatsit malillugu pineqaatissiineq naapertorlugu qinnuteqartoq pinerluuteqarsimasunut isumaginnittoqarfiup imaluunniit inunnik isumaginnittoqarfiup ataani paaqqinnittarfimmi imaluunniit ulloq unnuarlu neqeroorummi najugaqarsimappat tunniunneqarsinnaanngillat.*

#### *Pisariaqartitsineq malillugu ikorsiissutit*

**§ 10.** Pisariaqartitsineq malillugu ikorsiissutit aatsaat tunniunneqarsinnaapput qinnuteqartoq taassumaluunniit inooqataa kapitali 7 malillugu aningaasartuutit akilerniarnissaannut namminneerlutik aningaasaqarnikkut periarfissaqanngippata, pisariaqartitsinerlu inatsisit allat aqqutigalugit akilerneqarsinnaanngippata.

*Imm. 2. Pisariaqartitsineq malillugu ikorsiissutit aatsaat tunniunneqarsinnaapput ikorsiisoqarnissaanik pisariaqartitsinerit pisunik siumut takorloorneqarsinnaanngitsunik tassanngaannartunillu tunngaveqarsimappata.*

### **Kapitali 4**

#### *Piareersimasussaatitaaneq*

**§ 11.** Ikorsiissutinik annertussusileriikkkanik aamma pisariaqartitsineq malillugu ikorsiissutinik tigusisartut qaqugukkulluunniit communalbestyrelsimum piareersimasassapput aamma oqaloqatigiinnernut ataatsimiinnernullu peqataasassallutik kiisalu inatsimmi aalajangersakkat allat malillugit iliuusissatut pilersaarutit suliarinerannut pilersinnerannullu peqataasassallutik.

*Imm. 2. Naalakkersuisut qinnuteqartup sulisinnaassusia, suliffimmi misiliinera kiisalu qinnuteqartup piareersimasussaatitaanera pillugu malittarisassanik aalajangersaasinnaapput, taakkununngalu qanigisaasut tassanngaannartumik toqukkut qimagunnerat imaluunniit sakkortuumik nappaateqarnerat imaluunniit meerarisat napparsimancerat paarineqarnerallu ilaapput.*

**§ 12.** Inuussutissarsiummik ingerlataqarlutik namminersortut, taakkununnga inuit inuussutissarsiutigalugu aalisarnermik piniarnermillu ingerlataqartut ilanggullugit, Inatsisartut inatsisaat manna malillugu Inatsisartut inatsisaani piumasaqaatinik, tassanilu malittarisassanik aalajangersarneqartunik, naammassinnissimappata ikiorneqarnissamut pisinnaatitaaffeqarput.

**§ 13.** Ikiorsiissutinik annertussusileriikkanik tigusisartut § 25 malillugu qaammammut 1.000 kr.-ninik isertitaqarlutik sulinermik isumagisaqarsinnaapput, tamannalu aqqutigalugu communalbestyrelsimit piareersimassallutik. oqaloqateqarnernut ataatsimiinnernullu peqataasassallutik kiisalu iliuusissatut pilersaarutit suliarinerannut ingerlannissaanullu peqataasassallutik, takuuk § 11.

## Kapitali 5

*Innersuussisarneq, suliassaqarfut assigiinngitsut aqqutigalugit suleqatigiit, sulilernissamut piareersimaneq, iliuusissatut pilersaarutit, piumassutsimik siunnersortit allallu.*

### *Innersuussisarneq*

**§ 14.** Inuk ikiorneqarnissaq pillugu saaffiginnippat pineqartup sapinngisamik nammineerluni massakkut siunissamiluunniit aningaasaqarnikkut ajornartorsiutiminik qaangiisinnaanera pillugu ilitsorsorneqarnissamik pisariaqartitsinera pillugu communalbestyrelse ingerlaannaq naliliissaaq.

*Imm. 2. Ilitsersuummi pineqartup qanoq iliornluni sulinissamut ilinniarnissamulluunniit periarfissanik pitsangortitisinnaanera pillugu paasissutissat ilaassapput.*

### *Suliassaqarfut assigiinngitsut aqqutigalugit suleqatigiit*

**§ 15.** Kommunalbestyrelse Inatsisartut inatsisaat manna malillugu ikiorneqarnissaq pillugu qinnuteqartut innersuuttarnissaannut suliassaqarfut assigiinngitsut aqqutigalugit sulisussanik pilersitsissaq. Taakkunanng minnerpaamik suleqatigiissitaq ataaseq inuusuttunut 30-t inorlugit ukiulinnut innersuussisarnissanut immikkut toqqagaasimassaaq.

*Imm. 2. Inassutigineqartut suliassaqarfut assigiinngitsut aqqutigalugit suleqatigiissuneersut iliuusissatut pilersaarutit suliarineranni ilanngunneqassapput.*

### *Sulinernissamut piareersimanissaq*

**§ 16.** Kommunalbestyrelse annertussusileriikkanik ikiorneqarnissaq pillugu qinnuteqartoq suleqatigalugu qinnuteqartup qanoq nalinginnaasumik suliffimmi sapaatip akunneranut sivikinnerpaamik 20 tiimini sulisinnaanera imaluunniit ilinniarnermik aallartitsisinnaanera aamma tamanna pillugu immikkut

suliniuteqaqqaartoqarnissaanik pisariaqartitsiffiussanersoq pillugit tamanut isiginittumik nalilersuinermik suliaqassaaq.

*Imm. 2. Kommunalbestyrelse qinnuteqartoq ilumut sapaatip akunneranut ikinnerpaamik 20 tiimini pisarneq malillugu suliffeqarsinnaanersoq pillugu aalajangiissaq.*

#### *Iliusissatut pilersaarutit*

**§ 17.** Kommunalbestyrelse annertussusileriikkanik ikiorneqarnissaq pillugu qinnuteqartoq suleqatigalugu inummut aalajangersimasunut piareersakkamik iliuusissatut pilersaarummik suliaqassaaq, taamaattoq kapitali 8 takuuk.

*Imm. 2. Iliusissatut pilersaarummi anguniagassat sammisassallu ilanngunneqassapput, tassanilu qinnuteqartup ilinniarnermik ingerlataqarnissaanut imaluunniit suliatigut piginnaasaqalerfiusumik ingerlatsinissaanut periarfissaasa pitsangorsaaffiginissaat, qinnuteqartup sulilernissamut periarfissaasa suliarinissaat kiisalu qinnuteqartup suliffinnut attuumassuteqalernissa siunertarineqarput.*

*Imm. 3. Iliusissatut pilersaarummi qinnuteqartup ataatsimut atugarisai ilanngunneqassapput, taakkununngalu ilaqtariitsigut atugarisat, ineqarnikkut atugarisat, nappaatit, atornerluisuuneq, inuunikkut piginnaasat il.il. ilaassapput.*

*Imm.4. Kommunalbestyrelse inuuusuttunut 30-t inorlugit ukiulinnut iliuusissatut pilersaarutinik suliaqarnermini anguniagassanut sammisassanullu suliaqarnissamik pingaartitsissaaq, taakkualu sapinngisaq malillugu qinnuteqartup ilinnialernissaanut tapeeqataassapput.*

*Imm. 5. Naalakkersuisut iliuusissatut pilersaarutit imassaannut suliarinissaannullu malittarisassanik sukumiinerusunik aalajangersaasinnaapput, soorlu sammisassani, ilinniarnerni, suliffimmi sulilernissamut neqeroorutini, atuaqqinnissamut imaluunniit allatut qaffassaanissanut aammalu nappaatip katsorsarnissaanut tigusisartup peqataasarneratigut.*

**§ 18.** Kommunalbestyrelse iliuusissatut pilersaarummut ilaasumik qinnuteqartup sammisassanut peqataanissaanik aalajangiisinnaavoq, soorlu oqaloqatigiinnernut, suliniutinut, sulinermut sungiusarnermut, inuttut ineriartornissamut pikkorissartitsinernut, suliatigut pikkorissartitsinernut aammalu qulaajaanissanut tunniunneqartunut peqataasarnikkut. Kommunalbestyrelse qinnuteqartup sammisassanut inatsisini allani malittarisassiorneqartunut peqataasarnissa pillugu aamma aalajangiisinnaavoq.

#### *Piumassutsimik siunnersortit*

**§ 19.** Pisortanit ikorsiissutinik tigusisartumut isumaqatigiissuteqareernikkut piumassutsimik siunnersortimut isumaqatigiissusiornissamut kommunalbestyrelse ikuussinnaavoq. Piumassutsimik siunnersorti iliuusissatut pilersaarutip tamarmiusup ilaannaataluunniit suliarinissaanut pisortanit ikorsiissutinik tigusisartumut ikuutissaq.

*Imm. 2. Piumassutsimik siunnersortimit ikuuttoqarnissa pillugu isumaqatigiissut paasissutissanik makkununnga tunngasunik imaqassaaq:*

- 1) siunnersortimik ikiorteqarnermi siunertaq,
- 2) siunnersortip aqqa attavigineqarsinnaaneranullu paasissutissat,

- 3) suliassat suut siunnersortip ikuuuffigissanerai,
- 4) isumaqtigiissutip sivisussusissa, aamma
- 5) siunnersortimik ikorneqarnerup annertussusaa.

*Imm. 3. Piumassutsimik siunnersortimi ikiorteqarnermi apeqqutaassaaq pisortanit ikorsiissutinik tigusisumiit erseqqissumik akuersisoqarsimanissa, tassalu kommunalbestyrelsip paasissutissanik isertuussanik piumassutsimik siunnersortimut ingerlatitseqqissinnaanera, soorlu qinnuteqartup nammineerluni atugarisai pillugit paasissutissat.*

*Imm. 4. Piumassutsimik siunnersorti Pisortat ingerlatsineranni suliat suliarineqartarnerat pillugu Inatsisartut Inatsisaanni § 27 naapertorlugu nipangiussisussaatitaavoq. Pinerluttulerinermik Inatsimmi § 50, imm. 1 aamma 3 aammalu §§ 52-54 assinganik atuupput.*

*Imm. 5. Naalakkersuisut piumassutsimik siunnersorti pillugu malittarisassanik sukumiinerusunik aalajangersaasinnaapput.*

#### *Malitseqartitsineq nalilersueqqinnerlu*

**§ 20.** Iliusissatut pilersaarut suliarineqareerpat pisortanit ikorsiissutinik tigusisartoq piareersimanersoq sapaatillu akunneranut sivikinnerpaamik 20 tiimini pisarneq malillugu sulilersinnaanersoq kommunalbestyrelsip naliliiffigissavaa. Taamaattoq kommunalbestyrelsip ikinnerpaamik qaammatit 6-it qaangiunnerisigut iliussissatut pilersaarummut malitseqartitsissaq, pisortaniillu ikorsiissutinik tigusisartoq sulilernissaminut piareeqqanersoq naliliiffigeqqillugu.

*Imm. 2. Kommunalsbestyrelse pisortanit ikorsiissutinik tigusisartup massakkut sulisinnaassusianut aammalu Inatsisartut Inatsisaat manna malillugu ikiorserneqartuarnissaq imaluunniit suliffissarsiortutut ikorsiissutinut nuunnissaa pillugit nassuaammik suliaqassaaq.*

*Imm. 3. Pisortanit ikorsiissutinik tigusisartoq sulilernissaminut piareeqqanngippat kommunalbestyrelse iliussissatut pilersaarummut atuuttumut nalileeqqissaq imaluunniit Inatsisartut Inatsisaat manna naapertorlugu iliussissatut pilersaarummik nutaamik suliaqassalluni.*

**§ 21.** Kommunalbestyrelse ikorsiissutinik annertussusilikkanik akuersinerup kingorna kingusinnerpaamik qaammatit 12-t qaangiunnerisigut tigusisartoq pilersuinissamut ikorsiissutinut allanut nuussanersoq naliliissaq.

#### **Kapitali 6** *Ikorsiissutit annertussusileriikkat*

##### *Tunngaviusumik akigititaq*

**§ 22.** Tunngaviusumik akigititaq qaammammut 4.500 kr.-niuvoq, taamaattoq imm. 2 aamma 3 takukkit.

*Imm. 2. Ikorsiissutinik annertussusileriikkkanik tigusisartoq inuit allattorsimaffianni ineqanngitsutut nalunaarsorneqarsimappat tunngaviusumik akigititaq qaammammut 4.300 kr.-niussaaq, taamaattoq imm. 3 takuuk.*

*Imm. 3. Ikorsiissutinik annertussusileriikkkanik tigusisartoq taassumalu inooqataa marluullutik ikorsiissutinik annertussusileriikkkanik tigusisarsimappata tunngaviusumik akigititaq qaammammut 4.000*

kr.-niussaaq.

**§ 23.** Ikorsiissutinik annertussusileriikkaniq tigusisartoq pissuteqarnani iliuusissatut pilersaarummi aalajangerneqartutut suliniutini nammineerluni peqataanngippat suleqataanngippallu tunngaviusumik akigititami aningaasanik ullormut 210 kr.-ninut naapertuuttunik annikillisoqarnissaa pillugu kommunalbestyrelse aalangiissaq.

*Imm. 2. Iliuusissatut pilersaarutinut tunngatillugu tunngaviusumik akigititaq tapillu 2.100 kr.-nit qaammammut qaangerlugit annikillineqarsinnaanngillat.*

*Iliuusissatut pilersaarutinut tunngatillugu tapeqartitsineq*

**§ 24.** Iliuusissatut pilersaarummi aalajangerneqartutut sammisassani nammineerluni peqataasoqarnerani sammisassallu ingerlannissaanni communalbestyrelse tapinik tunniussaqassaaq. Tapeq qaammammut 500 kr.-niuvoq.

*Imm. 2. Inuk iliuusissatut pilersaarummi aalajangerneqartutut pissutissaqarnani nammineerluni peqataasimangippat imaluunniit ingerlatseqataanngippat communalbestyrelse qaammammut pineqartumut iliuusissatut pilersaarutinut tapiissuteqarsinnaanngilaq.*

*Iliuusissatut pilersaarutinut tunngatillugu tunngaviusumik akigititamik tapinillu annikillisitsineq*

**§ 25.** Tunngaviusumik akigititaq taperlu piffissami inuup tunngaviusumik akigititamik tapimillu tigusiffisaani aningaasarsiarineqartunik allanik annikillisinneqassapput. Iliuusissatut pilersaarutinut tunngatillugu tunngaviusumik akigititaq aningaasarsianik allanik qaammammut 1.000 kr.-ninik qaangiisunik 62,2 %-imik ilanngaaffigineqassaaq.

**§ 26.** Tunngaviusumik akigititaq taperlu piffissamut inuup iliuusissatut pilersaarutinut tunngaviusumik akigititamik tapimillu tigusiffisaanut naapertuuttumik aapparisap massakkut aningaasarsiarisaasa ilaannik ilanngarneqassapput. Tunngaviusumik akigititaq taperlu aapparisap piffissamut pineqartumut massakkut aningaasarsiaasa 30 %-iannut naapertuuttumik ilanngarneqassapput.

**§ 27.** Tunngaviusumik akigititaq pisortanit ikorsiissutinik tigusisartoq paaqqinnittarfimmil imaluunniit ulloq unnuarlun neqeroorummi pisortat aningaasartuutaasunik akiliiffigisartagaanni sivisunerusumik najugaqarsimappat annerpaamik 2.500 kr.-niusinnaavoq.

*Piginneqatigiilluni inigisamut, nammineq pigalugu inigisamut il.il. tapeqartitsineq*

**§ 28.** Kommunalbestyrelse pisortanit ikorsiissutinik annertussusileriikkaniq tigusisartumut piginneqatigiilluni inissiami, nammineq inissiami pigisami assigisaanniluunniit najugaqartumut qaammammut 2.500 kr.-nit angullugit tapinik tunniussaqarsinnaavoq. Tapeq akiliutigineqartut ernianullu aningaasartuutit akilernissaannut qaammammut 2.500 kr.-nit angullugit tunniunneqarsinnaavoq. Inatsisartut inatsisaat manna malillugu inuk piffissamut sivikinnerusumut ikorsiissutinik tigusaqartarpattapeq allanut sanilliullugu appasinneq tunniunneqassaaq.

*Imm. 2. Inigineqartoq qinnuteqartumit taassumalu inooqataanit inissiatut atorneqarpat akiliutigineqartut ernianullu aningasartuutit imm. 1 malillugu akiliutigineqartut ernianullu aningasartuutit tamarmiusut affaattut naatsorsorneqassapput.*

*Imm. 3. Imm. 1 malillugu aningasarsiat akileraaruteqaataasussat naatsorsorneranni tapeq ilanngullugu naatsorsorneqassanngilaq.*

*Suliffissarsiornermi tunniunneqartartuniit nuunneq*

**§ 29.** Inuit sivisumik napparsimanertik pissutigalugu suliffissarsiornermi tunniunneqartunut pisinnaatitaaffeeruttut pisortaniillu ikorsiissutinut nuuttut § 22 naapertorlugu tunngaviusumik akigitatap saniatigut ikaarsaariarnermut tapimik tunineqassapput. Ikaarsaariarnermut tapeq qaammammut 3.000 kr.-niuvoq. Ikaarsaariarnermut tapeq qaammatit arfinillit angullugit tunniunneqartarpoq.

*Iluarsiissuteqartarneq*

**§ 30.** Tunniunneqartartuni tunniunneqartartunut ilanngaatinullu kiisalu pigisanut killiliinernut akigititat Procenti aaqqiissutissaq maannakkorpiarlu aningasarsiat pillugit Inatsisartut Inatsisaat naapertorlugu akigititanut procenti aaqqiissutissaq malillugu ukiumoortumik 1. januar iluarsiiffigineqartarput. Naalakkersuisut akigititanut iluarsiissutit Naalakkersuisut nittartagaatigut tamanut saqqummiutissavaat.

**Kapitali 7**

*Pisariaqartitsineq malillugu ikorsiissutit*

*Tassanngaannartumik ataasiaannartumik ikorsiissutit*

**§ 31.** Kommunalbestyrelse pisut immikkut ittut siumullu oqaatigineqarsinnaangitsut kingunerisaannik tassanngaannartumik pisariaqartitsisoqarneratigut ikorsiissutinik tunniussisinnaavoq. Tassanngaannartumik pisariaqartitsisoqalerneratigut ikorsiissutit inuunermi pisariaqartitanut aningasartuutit pisariaqartinneqartut matussuserallarnissaannut utaqqiisaasumik tunniunneqartarput, soorlu ineqarallartitsinernut, nerisanut, kiassarnermut, sarfamut atisanullu, matuman qinnuteqartoq aapparisaaluunniit aningasartuutit akilernissaannut aningasaqarnikkut periarfissaqarsimanngippata.

*Imm. 2. Imm. 1 malillugu ikorsiissutigineqartut nalilersuilluareernikkut qaammammut ataasiartumik tunniunneqartarput. Imm. 1 malillugu ikorsiinerni qaammatit 3-t sinnerlugit tunniunneqartuni iliuusissatut pilersaarummik suliaqartoqarsimanissa piumasarineqarpoq.*

*Imm. 3. Naalakkersuisut tessanngaannartumik pisariaqartitsisoqalerneratigut ikorsiissutit pillugit malittarisasanik aalajangersaasinnaapput, tassungalu ilaallutik ikorsiissutit qanoq ittuunissaat aamma annertussusissaat pillugit malittarisassat, qanoq sivisutigisumik ikorsiissuteqartoqassanersoq kiisalu iliuusissatut pilersaarummut aamma piareersimanissamut pisussaaffinnut piumasaqarneq.*

*Ataasiartumik aningasartuutit*

**§ 32.** Kommunalbestyrelse ataasiartumik aningasartuutit pisut immikkut ittut siumullu oqaatigereerneqarsinnaangitsut kingunerisaannik pilersut matussusernissaannut ikorsiissutinik

tunniussisinnaapput, nammieq aningaasartuutinik akiliinissaq qinnuteqartup ilaquaasalu siunissami imminnut isumaginissaminut periarfissaannik malunnartumik ajornassappat.

*Imm. 2. Inigisamut kinguaattoorutit akilernissaannut ikorsiissutit ilaqtariinnut meeqqanik mikisunik angerlarsimaffinniittutilinnut imaluunniit angajoqqaanngortussanut taamaallaat tunniunneqarsinnaapput.*

#### *Nuunnermi ikorsiissutit*

**§ 33.** Kommunalbestyrelse qinnuteqartup ilaquaasalu ineqarnikkut atugarisaannut pitsangoriaataasinnaasumik nuunnissap akilernissaanut ikorsiissutinik tunniussisinnaapput, matumani qinnuteqartoq imaluunniit taassuma inooqataa aningaasartuutit akilernissaannut periarfissaqanngippata. Nuunnissaq kommunimut allamut pineqarpat, ikorsiinerlu kommunip nuuffiusussap akuersisimanissaani piumasarineqarpat.

#### *Ilisinermi aningaasartuutit*

**§ 34.** Kommunalbestyrelse Kalaallit Nunaanni ilisinermut aningaasartuutinut naleqquttunut akiliussisoqarnissaanut ikorsiissutinik tunniussisinnaavoq, matumani najugaqatigiiffik aningaasartuutit akilernissaannut aningaasaqarnikkut periarfissaqanngippat, toqukkullu qimaguttoq § 5-im i piumasarineqartunik naammassinnissimappat.

*Imm. 2. Kommunalbestyrelse inuup Kalaallit Nunaanniittup illoqarfimmi nunaqarfimmiluunniit kingullermik najugaqarfingisamaata avataani toqukkut qimagussimappat aamma najugaqatigiiffik kingornussisussalluunniit aningaasartuutit akilernissaannut aningaasaqarnikkut periarfissaqanngippata, toqukkullu qimaguttoq § 5-im i piumasarineqartunik naammassinnissimappat, illerfiup angerlaannissaanut pisortanit ikorsiissutinik tunniussisinnaavoq. Kalaallit Nunaanni angerlaassilluni assartuinermut taamaallaat ikorsiissutinik tunniussisoqarsinnaavoq.*

*Imm. 3. Ilisinermut ikorsiissutit aamma illerfiup angerlaannissaanut ikorsiissutit tunniunniisaannut aningaasaqarnikkut piumasaqaatit qanoq annertutiginissaat siumut aalajangiiffingeqarsinnaanngippata kommunalbestyrelse ikorsiissutinik siumoortumik tunniussisinnaavoq, utertitsilluni akiliisoqarnissaanik piumasaqaatalimmik, pigisat nalillit naatsorsorneqareerneranni paasinarsissappat tamakkiisumik ilaannakuusumilluunniit pigisanit akiliisoqarsinnaasoq.*

#### *Qanigisat perulunnerat aamma/imaluunniit toqunerat ilisaanerallu*

**§ 35.** Kommunalbestyrelsi qanumut qanigisaasut perulunnerannut aamma/imaluunniit toqunerannut ilisaanerannullu atatillugu angalanermut aningaasartuutit akilernissaannut ikorsiissutinik tunniussisinnaavoq, matumani aningaasartuutinik nammineerluni akiliinissami qinnuteqartup ilaquaasalu siunissami imminnut isumaginissaannut periarfissaat ajornarnerulersisisimappata.

Kommunalbestyrelsimit piumasarineqarpat nakorsaamit uppernarsaammik tunniussisoqassasoq, uppernarsaammik piniarnermut aningaasartuutit kommunalbestyrelsip akilissavai. Kalaallit Nunaanni angalanissamut ikorsiissutinik taamaallaat tunniussisoqarsinnaavoq.

*Nunani allani inuiattut innuttaassuseqartunut angerlamut angalatitsisarneq*

**§ 36.** Kommunalbestyrelse qinnuteqartup kommunimi angerlarsimaffigisaaniittooq nunani allani inuiattut innuttaassuseqartut angerlamut angalanissaannut angalanermut aningaasartuutit akilernissaannut ikorsiissutinik tunniussisinnaavoq.

*Imm. 2. Ikiorsinissami piumasarineqarpoq:*

- 1) qinnuteqartoq Kalaallit Nunaanni unioqquqitsinani najugaqartussaasoq, aamma
- 2) qinnuteqartoq taassumaluunniit inooqataa angalanermut aningaasartuutit akilernissaannut namminneerlutik aningaasaqarnikkut periarfissaqarsimannginnissaat.

## **Kapitali 8**

*Napparsimaneq naartunermilu sulinngiffeqarneq*

**§ 37.** Inuit napparsimasutut nalunaartut, taakkununnga Kalaallit Nunaanni avataaniluunniit napparsimmavimmi uninngasut ilanngulligit, makku pillugit aalajangersakkat malillugit pisortanit ikorsiissutinik pisinnaatitaaffeqarput:

- 1) kapitali 6 naapertorlugu ikorsiissutit annertussusileriikkat,
- 2) § 31 naapertorlugu tassanngaannartumik ataasiartumik ikorsiissutit,
- 3) § 32 naapertorlugu ataasiaannartumik aningaasartuutit,
- 4) § 33 naapertorlugu nuunnissamut ikorsiissutit,
- 5) § 34 naapertorlugu ilisinermut aningaasartuutit, aamma
- 6) § 35 naapertorlugu qanimut qanigisaasut perulunnerat aamma/imaluunniit toqunerat ilisaanerallu.

*Imm. 2. Pissutissaqarani uninnganani napparsimanerit communalbestyrelsimit nalunaarutigineqassapput, sapinngisarlu malillugu nakorsap allagarsiussaatigut upternarsarneqarnissaa piumasarineqarsinnaalluni. Tamatumunnga aningaasartuutit communalbestyrelsimit akilerneqassapput. Inuup peqqisisutut nalunaarutiginissaa tikillugu iliuusissatut pilersaarummik suliaqartoqassanngilaq. Inuk iliuusissatut pilersaarummi aalajangersarneqartutut suliniutit ingerlannissaannut kiisalu takkunnissamut nammineerlunilu peqataanissamut pisussaafferutissaq.*

**§ 38.** Inuit Naartunermut, erninermut meeravissiartaarnermullu atatillugu sulinngiffeqartarneq pillugu lnatsisartut lnatsisaat naapertorlugu sulinngitsoornissamut sulinngiffeqarnissamullu pisinnaatitaaffillit makku pillugit aalajangersakkat malillugit pisortanit ikorsiissutinik pisinnaatitaaffeqarput:

- 1) kapitali 6 naapertorlugu ikorsiissutit annertussusileriikkat,
- 2) § 31 naapertorlugu tassanngaannartumik ataasiartumik ikorsiissutit,
- 3) § 32 naapertorlugu ataasiaannartumik aningaasartuutit,
- 4) § 33 naapertorlugu nuunnissamut ikorsiissutit,
- 5) § 34 naapertorlugu ilisinermut aningaasartuutit, aamma
- 6) § 35 naapertorlugu qanimut qanigisaasut perulunnerat aamma/imaluunniit toqunerat ilisaanerallu.

*Imm. 2. Inuk sulinngiffeqarnissamut pisinnaatitaaffeqartillugu iliuusissatut pilersaarummik suliaqartoqassanngilaq. Inuk iliuusissatut pilersaarummi aalajangersarneqartutut suliniutit ingerlannissaannut kiisalu takkunnissamut nammineerlunilu peqataanissamut pisussaafferutissaq.*

**§ 39.** Meeqqamut 15-it inorlugit ukiulimmut sivisunerusumik napparsimasoqarnera pissutigalugu napparsimmavimmi uninngasumut qanimat qanigisaasut makku pillugit aalajangersakkat malillugit pisortanit ikorsiissutinik pisinnaatitaaffeqarput:

- 1) kapitali 6 naapertorlugu ikorsiissutit annertussusileriikkat,
- 2) § 31 naapertorlugu tassanngaannartumik ataasiartumik ikorsiissutit,
- 3) § 32 naapertorlugu ataasiaannartumik aningaasartuutit,
- 4) § 33 naapertorlugu nuunnissamut ikorsiissutit,
- 5) § 34 naapertorlugu ilisinermut aningaasartuutit, aamma
- 6) § 35 naapertorlugu qanimat qanigisaasut perulunnerat aamma/imaluunniit toqunerat ilisanerallu.

*Imm. 2. Pissutissaqarani uninnganani napparsimanerit communalbestyrelsimit nalunaarutigineqassapput, nakorsallu allagarsiineratigut uppermarsaqquneqarsinnaalluni, aningaasartuullu communalbestyrelsimit akilerneqassalluni. Meeqqap angerlartinnissaa tikillugu iliuusissatut pilersaarummik suliaqartoqassanngilaq. Qanimat qanigisaasut iliuusissatut pilersaarummi aalajangersarneqartutut suliniutit ingerlannissaannut kiisalu takkunnissamut nammineerlunilu peqataanissamut pisussaafferutissapput. § 8, imm. 1 naapertorlugu suliffeqanngitsuunissamut aammalu pisarneq malillugu sapaatip akunneranut ikinnerpaamik 20 tiimini suliffeqarnissamut piumasaqarneq aalajangersakkamut tassunga tunngatillugu ilaquaasunut qanigisanut uani pineqartunut atorneqassanngilaq.*

## Kapitali 9

*Pigisat nalillit*

**§ 40.** Kommunalbestyrelse qinnuteqartoq taassumaluunniit inooqataa tigoriaannarnik aningaasaateqarsimappata imaluunniit tuniniariaannarnik 15.000 kr.-nit qaangerlugit nalilinnik pigisaqsimappata ikorsiissutinik annertussusileriikkkanik tunniussisinnaanngilaq, taamaattoq imm. 2 aamma 3 takukkit.

*Imm. 2. Imm. 1 malillugu aningaasat tigoriaannaat pigisallu tuniniariaannaat atortunut qinnuteqartup inooqataataluunniit inuussutissarsiutaasa ingerlannissaannut aserfallatsaaliorissaannullu immikkoortinnejartunut qinnuteqartup inooqataataluunniit inuussutissarsiutaannut ilaasut imaluunniit qinnuteqartup, taassuma inoqataata meeraasaluunniit ilinniarnissaannut ilaasut pigisanut nalilinnut killissarititaq 25.000 kr.-nik qaffaaffigineqarsinnaavoq.*

*Imm. 3. Imm. 1 malillugu aningaasat tigoriaannaat imaluunniit pigisat tuniniariaannaat qaangerneqarsinnaanngitsumik inuttut ajoqusernerit kingunerannik tunniunneqartut ajunngitsorsiassanut makku malillugit ilaangillat:*

- 1) Pinerlunnernik eqqugaasunut naalagaaffimmit taarsiissuteqartarneq pillugu Inatsit.
- 2) Taarsiissuteqarnermut akisussaaneq pillugu Inatsit
- 3) Kalaallit Nunaanni sulitilluni ajoqusersinnaanermut isumannaarineq pillugu inatsit.

*Imm. 4. Imm. 3-mut tunngatillugu ajunngitsorsiassat inuup taassumaluunniit inooqataata pigisaanit isertitaanillu allanit avissaarteqqanissaat atuuppoq.*

## Kapitali 10

*Allaffissorneq allallu*

*IT-qarnermut atortut ataatsimoorussat*

**§ 41.** Kommunit Naalakkersuisullu Inatsisartut inatsisaata matuma atornissaanut pisortani IT-qarnermut atortumik ataatsimoorussamik atuissapput.

*Qinnuteqarneq*

**§ 42.** Inatsisartut inatsisaat manna malillugu tunniunneqartussat pillugit qinnuteqaat kommunalbestyrelsimit qinnuteqartup aalajangersimasumik kommuneqarfingisaaniittumut tunniunneqassaaq, taamaattoq imm. 2 aamma 3 takukkit.

*Imm.* 2. Nunani allani inuiattut innuttaassusilinnut tassanngaannartumik ataasiarluni ikorsiissutit imaluunniit angerlamut angalanissaq pillugu qinnuteqaatit kommunalbestyrelsimit qinnuteqartup najugaqarfingisaaniittumut tunniunneqassapput.

*Imm.* 3. Inuit kommunit aggorneqarnerisa avataani aalajangersimasumik najugallit uninngasulluunniit qinnuteqaatitik Naalakkersuisunut aalajangiisusanut tunniutissavaat.

*Imm.* 4. Ikorsiissutit annertussusileriikkat pillugit qinnuteqaatip tiguneraniit kingusinnerpaamik ullut 14 qaangiutsinnagit qinnuteqartup siullermik ataatsimeeqatiginissaanut kommunalbestyrelse isumaqatigiissuteqassaaq.

*Nalunaartussaatitaaneq aamma nakkutilliisussaatitaaneq*

**§ 43.** Kommunalbestyrelse ikorsiissutinik qinnuteqartumiit imaluunniit tunineqartartumiit akuersissuteqartoqareerneratigut pisortanit ikorsiissutit pillugit suliat suliarinissaannut pineqartoq pillugu paasissutissanik pisariaqartinneqartunik pisortani oqartussat allat tunniussinissaannik piumasaqarsinnaavoq. Tamanna aamma ilinniartoqarfinnut, napparsimavinnut, nakorsanut, tarnip pissusaanik ilisimasalinnut, peqqinnissaqarfimmi sulisunut akuerisaasunut allanut aammalu taakku sinnerlugit akisussaasunut, aningaaserivinnut, sulisitsisunut namminersortunullu pisortat sinnerlugit suliaqartunut atuuppoq. Tamatumani aamma inuup namminerpiaq atugarisaanut paasissutissat paasissutissallu isertuussassat allat pineqarput, soorluttaarlu oqartussaq nakorsap journalinik, napparsimavimmi journalinik imaluunniit taakkua assilinerinik piniarsinnaassasoq.

*Imm.* 2. Kommunalbestyrelse akuersissummik piniaqqaarnani suliap ataatsip suliarinissaanut atugassanik imaluunniit ataatsimut nakkutiginninnissamut atugassanik inuup taassumalu inooqataata qinnuteqartut ikiorneqartulluunniit aningaasaqarnikkut atugarisaat feeriarnissaanullu atugarisaat pillugit paasissutissanik pisortani oqartussaasunit allaneersunik piumasaqarsinnaavoq. Paasissutissat taamaattut inoqutigiinniittunut allanut tunngasut piniarneqarsinnaassapput.

*Imm.* 3. Kommunalbestyrelse innuttaasumit akuersissummik piniaqqaarnani pisortanit ikorsiissutit pillugit suliat nakkutiginnissaannut atugassanik aningaaserivinniit sulisitsisuniillu paasissutissanik pisariaqartinneqartunik aningaasaqarnikkut atugarisanut tunngasunik piumasaqarsinnaavoq.

*Imm.* 4. Qinnuteqartoq imm. 1 naapertorlugu communalbestyrelsip paasissutissanik piniarnissaanut akuersinngippat suliaq paasissutissat pigineqartut tunngavigalugit suliarineqassaaq, imm. 2 naapertorlugu paasissutissat akuersissummik piniaqqaarnani pissarsiarineqarsinnaasimangippata.

**§ 44.** Inatsisartut inatsisaat manna malillugu tunniunneqartunik tigusisut inuttut aningaasaqarnikkulluunniit atugarisanut allanngornerit tunniunneqartartut nalilersuiffgeqqinnissaannik unitsinneqarnissaannilluunniit kinguneqartut pillugit kommunalbestyrelsimit nalunaaruteqarnissamik pisussaaffeqarput.

**§ 45.** Kommunalbestyrelse tunniunneqartussat tunniunneqarneranni nakkutiginninnissamik pisussaaffeqarpoq, inunnulu taakkununnga pisinnaangitsunut tunniussisoqannginnissaanik nakkutiginnissalluni.

*Imm. 2.* Paasissutissanik pisortanit ikorsiissutinik tigusisartup inooqataataluunniit piaaralutik paasissutissanik eqqunngitsunik nalunaaruteqarsimannerannik imaluunniit pisortanit ikorsiissutit tunniunnissaannut allanguutit pingaarutillit pillugit paasissutissanik tunniussaqarusussimanginnerannik kommunalbestyrelse tunngavissaqarluni isumaqalersimappat pisoq kommunalbestyrelsip politiinut unnerluutigissavaa.

#### *Tunniussineq*

**§ 46.** Inatsisartut Inatsisaat manna malillugu ikorsiissutit annertussusileriikkat qaammatip naalernerani qaammatit tamaasa kingumut tunniunneqartarput. Ikorsiissutit annertussusileriikkat aningaasarivimmuit nuunneqassapput, taamaattoq imm. 3 takuuk.

*Imm. 2.* Kommunalbestyrelse aalajangiisinnavaoq akiliinissaq tak. imm. 1 pisuni immikkut ittuni agguardeqassasoq qaammatikkaartunik akiliuteqartarnernut arlalinnut.

*Imm. 3.* Kommunalbestyrelse immikkut pisut pisariaqartissimappassuk ikorsiissutit annertussusileriikkat nerisassarsiutissatut, akiligassanik sulialimmuit toqqaanartutut aningaasanngorluguluunniit tunniunnissaannut aalajangiisinnavaoq.

*Imm. 4.* Kommunalbestyrelse pisariaqartitsineq malillugu ikorsiissutit tunniunnissaat pillugu aalajangiisinnavaoq, soorlu immikkut pisut pisariaqartissimappassuk ikorsiissutit nerisassarsiutissatut, akiligassanik sulialimmuit toqqaanartutut aningaasanngorlugilluunniit tunniunneqassanersut.

*Imm. 5.* § 36 malillugu angerlamut angalanissamut angalanermut aningaasartuutinut pisariaqartitsineq malillugu ikorsiissutit Kalaallit Nunaanni angalatitsivimmuit tunniunneqarsinnaapput, taassumalu angerlamut angalanissamut ilaassutissap inniminnerneqarnissaa isumagissavaa.

**§ 47.** Ikorsiissutit annertussusileriikkat § 8-mi piumasaqaatit atuutilernerisa kingorna ulloq saaffiginniffusoq siulleq aallartiffagalugu tunniunneqassapput.

**§ 48.** Inatsisartut inatsisaat manna malillugu tunniussinissamut piumasarineqartut naammassineqarunarpa tunniunneqartartut unitsinnissaat pillugu kommunalbestyrelse aalajangiissaq. Kalaallit Nunaat qimallugu nuuttoqarnerani tunniunneqartartut ingerlaannaq unitsinnissaat pillugu kommunalbestyrelse aalajangiissaq.

#### *Akiliussineq*

**§ 49.** Inatsisartut inatsisaat manna naapertorlugu tunniunneqartut aatsaat akileqquneqarsinnaapput allatulluunniit pinngitsaaliiłuni akileqquneqarsinnaapput pisortani oqartussaasunut akitsoqartoqarsimappat.

#### *Akiliutit*

**§ 50.** Katissimanermut inatsisit imaluunniit meeqqat inatsisitigut inissisimanerannut inatsit malillugit inuk inummut pisortanit ikorsiissutinik tigusisartumut akilersuinissamik pisussaaffilerneqarsimappat akilersuisussaatitaasumut aningaasat ikorsiissutaasut assigisaannik akilersuisussaatitaasumut pisortat piumasaqarsinnaassaapput, § 2, imm. 3 malillugu pilersuisussaatitaaneq unissimagaluarpualluunniit.

*Imm. 2.* Pisortat akilersuutit aalajangersaaffiginissaannut qaffanneqarnissaannulluunniit piumasaqarnissamut pisinnaatitaaffimmil ilanngutissapput.

#### **Kapitali 11**

##### *Utertitsilluni akiliuteqarneq*

**§ 51.** Kommunalbestyrelse Inatsisartut inatsisaat manna malillugu tunniunneqartut tiguneqartut utertinneqarnissaat pillugu aalajangiissaaq, tigusisoq:

- 1) paassisutissanik communalbestyrelsmit tunniussisussaalluni ilisimaarereerlugu tunniussisimanngippat, takuuk § 44,
- 2) ilisimareeraluarlugu Inatsisartut inatsisaat manna malillugu ikorsiissutinik eqqunngitsumik tigusaqarsimappat, imaluunniit
- 3) kingusinnerusukkut taarsiissutinik, pisortanit pensionisanik, meeqqamut akilersuutinik assigisaannilluunniit piffissami tassani tunniunneqartussanik, tunniunneqartussanullu siunertalinnik tunineqarsimappat.

**§ 52.** Inatsisartut inatsisaat manna malillugu qinnuteqartoq taassumaluunniit inooqataa illumik aalaakkaasumik qinnuteqartup inooqatigisaataluunniit najukkatut atunngisaannik pigisaqarpata ikorsiissutit utertitassanngorligit tunniunneqassapput.

*Imm. 2.* Qinnuteqartup illutigineqartumi aningaasanngorlugu killeqanngitsumik nalilinnik peqartoqanngitsoq upternarsarsinnaappagu imm. 1 atutissanngilaq.

**§ 53.** Kommunalbestyrelse pineqartup aningaasaqarnikkut illersorneqarsinnaanngitsumik imaluunniit sulinikkut illersorneqarsinnaanngitsumik iliusti pissutigalugit § 8 malillugu ikorsiissutit annertussusileriikkat saniatigut inummut ikorsiissutinik tunniussisoqassappat pisortanit ikorsiissutit utertinneqarnissaat pillugu aalajangiisinnaavoq.

*Imm. 2.* Kommunalbestyrelse imm. 1 naapertorlugu pisortanit ikorsiissutit utertinissaannik piumasaqarneq pillugu aalajangiippat tamanna pisortanit ikorsiissutinik tigusisartumut allakkatigut nalunaarutigineqassaaq, kingusinnerpaamillu pisortanit ikorsiissutit tunniunneqarnerannut peqatigitillugu.

*Imm. 3.* Imm. 1 malillugu pisortanit ikorsiissutit utertinneqarnissaannik piumasaqarneq tunniunneqartut ukiut marluk qaangiunnerisigut pisoqalisimassaaq.

## Kapitali 12

*Naammagittaallior sinnaaneq*

**§ 54.** Inatsisartut inatsisaat manna malillugu communalbestyrelsimit Naalakkersuisuniillu aalajangiunneqartut Inunnik Isumaginninnerup aqunneqarnera aaqqissuusaaneralu pillugit Peqqusummi aalajangersakkat qaumulluunniit atuuttut naapertorlugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

## Kapitali 13

*Aningaasalersuineq naatsorsuutillu*

**§ 55.** Inatsisartut inatsisaat manna malillugu aningaasartuutit communalbestyrelsimit akilerneqassapput, taamaattoq imm. 2 takuuk.

*Imm. 2.* Inunnut kommunit aggornerisa avataani najugalinnut pisortanit ikorsiissutinut aningaasartuutit Nunatta Karsianit akilerneqassapput.

*Imm. 3.* Pisortanit ikorsiissutinut aningaasartuutit nunani allani innuttaasunut § 31 aamma § 36 naapertorlugit akilerneqartussat Nunatta Karsianit aningaasartuutigineqassapput.

**§ 56.** Kvartalip ukillu qaammatisiuteqarfiusup naanerisa kingorna kingusinnerpaamik qaammatip ataatsip qaangiutinnginnerani Inatsisartut inatsisaat manna malillugu tunniunneqartartunik tigusisartumut kisitsisigut paassisutissat communalbestyrelsip Naalakkersuisunut nalunaarutigissavai.

*Imm. 2.* Paassisutissat nalunaarutigineqartussat imarisassaat ilusilersorneqarnissaallu pillugit malittarisassat Naalakkersuisunit aalajangersarneqassapput.

## Kapitali 14

*Atortuulersitsineq*

**§ 57.** Inatsisartut inatsisaat atortuulersinneqarpoq nalunaarutip kingorna ulloq 1. januar imaluunniit 1. juli.

*Imm. 2.* Peqatigitillugu Pisortanit ikorsiissutit pillugit Inatsisartut peqqussutaat nr. 15, 20. november 2006-imeersoq atorunnaassaaq.

*Imm. 3.* Angerlarsimaffimmi ikiorteqarneq pillugu Namminersornerullutik Oqartussat nalunaarutaat nr. 32, 26. juli 1994-imeersup atorunnaarnissaa imaluunniit malittarisassanik nutaanik taarserneqarnissaa tikillugu atuutiinnassaaq.

## Kapitali 15

*Ikaarsaarnermi aalajangersakkat*

**§ 58.** Inuit Inatsisartut inatsisaata matuma atuutilernerani pisortanit ikorsiissutinik tigusisartut Inatsisartut inatsisaanni matumani aalajangersakkat naapertorlugit ingerlaannartumik immikkullu aalajanginertaqanngitsumik ikorsiissutinik annertussusileriikkanik tigusisinnaasutut nuussapput.

*Imm. 2. Pisortanit ikorsiissutit pillugit Inatsisartut inatsisaat manna naapertorlugu iliuusissatut pilersaarutit suliarineqareerlutik pioreersut Inatsisartut inatsisaat manna malillugu allanngornatik atorneqassapput. Inatsisartut inatsisaata matuma atuutilerneraniit ukioq ataaseq qaangiutsinnagu kommunalbestyrelse inunnut pisortanit ikorsiissutiniit ikorsiissutinut annertussusileriikkanut aamma pisariaqartitsineq malillugu ikorsiissutinut nuuttunut iliuusissatut pilersaarutinik nutarterissaq.*

*Imm. 3. Inatsisartut inatsisaata matuma atuutilerneraniit ukioq ataaseq qaangiutsinnagu suliffissarsiortutut tunniunneqartartunut allatulluunniit pilersornissamut nooratarsinnaanerup isummerfiginissaa siunertaralugu pisortanit ikorsiissutit pillugit sulianut massakkut ingerlasunut kommunalbestyrelse nalilersuissaq.*

**§ 59.** Inatsisartut inatsisaata ullormi atuutilerfiani qaammatip affaanut siumoortumik ikorsiissutinik annertussusileriikkanik tunniussisoqassaaq.

*Imm. 2. Inatsisartut inatsisaata ulloq atuutilerfiata kingorna ulla 15-it qaangiuppata qaammatip affaanut siumoortumik ikorsiissutinik annertussusileriikkanik tunniussisoqassaaq.*

*Imm. 3. Ikorsiissutit annertussusileriikkat, tak. imm. 2 aamma imm. 3, tunngaviusumik akigititaq atorlugu tunniunneqassapput, tak. § 22, aamma iliuusissatut pilersaarummut tapeq, tak. § 24, aamma aningaasarsianut ilanngaat ilanngunnagu, tak. § 25-26. § 27 assigisaanik atortinneqassaaq.*

---

Inatsisartut inatsisaat nr. 25, 25. november 2022-meersoq (2023-mut ukiumut missingersuusiorfiusumut kommuninut ataatsimoortumik tapiissutit pillugit isumaqatigiissut naapertorlugu atortuulersitsinermut ulluinik ikaarsaarnermilu aalajangersakkanik allangortitsineq)<sup>[1]</sup> atuutilernissaanik aalajangersakkanik makkuninnga imaqarpoq:

### § 3

Inatsisartut inatsisaat atortuulersinnejassaaq saqqummiunneqarnerata aqaguani.

---

Inatsisartut inatsisaat nr. 32, 13. juni 2023-meersoq (Atortuulersitsinermut ulluinik aamma ikaarsaarnermi aalajangersakkanik allanguineq)<sup>[2]</sup> atuutilernissaanik aalajangersakkanik makkuninnga imaqarpoq:

### § 3

Inatsisartut inatsisaat atortuulersinnejassaaq saqqummiunneqarnerata aqaguani.

---

**Aka Grønvold (atsior.)**  
Naalakkersuisoqarfimmi pisortaagallartoq

/ Mehdi Shams (atsior.)

[1] Inatsimmi allannguut § 57, imm. 1 aamma § 59.

[2] Inatsimmi allannguut § 57, imm. 1 aamma § 59.

**Namminersorlutik Oqartussat**

Imaneq 4  
3900 Nuuk  
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut